

甄括纪遊草

海昌鍾大元署卷



溫州市

公館

甄括纪遊草

共 | 册 存 | 册 排架号

08810

游
草

區
括
紀

余
端



民國八年己

未夏五出版

甌括紀遊草序

余素不吝佛而于佛家因果二字每三致意焉永嘉山水甲於江浙古今共談余十數年來屢欲襍被往遊終惜其無因可至遂中止前宣統己酉正月余典鐸元和時握長洲學篆者爲無錫唐桐卿先生先生尸義賑久所至有聲垂老不倦品優學粹余心折其爲人兩署一宅院別東西以是風瀟雨晦時相過從晤談忘倦而不知覽永嘉山水之勝卽種因於酒闌燈施時也閱二年辛亥江皖澇桐老奔走兩省總查賑務余亦奉馮夢華中丞檄調辦淮之清河春賑皖之當塗秋賑事甫竣漢皋烽火人心震懾各回鄉里余以爲從此蜷伏牖下浙東山水之因靳

於是矣壬子夏甌括洪水爲災青田尤甚全城蕩然人民淹斃無數余覽報章心竊憫之時桐老已抱病滬上命哲嗣慕潮觀察疊次函招促予往賑時道路荆棘各有戒心相率裹足余思若不於此時稍種善因將焉待遂束裝就道由滬晤桐老力疾籌墊纒屑兩萬囊棉衣萬餘襲渡海至甌由甌至括之青田分別查放後盛杏蓀宮保又寄前粉萬包囑余往賑景寧瑞安兩縣景寧苦居萬山中與閩省接壤自青田放舟十日始達兩岸奇峰中流亂石雖蜀道之難殆無以過之事畢復折回至甌之瑞安風馬雨車刻無停晷告成後來永嘉始得與客中諸友小作勾留略窮此間山水之勝然後知種因於十數年前者至此

始能收眼前之效果也斯役也於九月望起程除夕日回里其中間有山川紀勝之篇友朋贈答之作藏之行篋本無心於示人癸丑春二月抱疾劇甚鬱鬱家居感逝傷離寸心如擣回憶半生來受種種魔障種種煩惱證之今生似於佛家因果轉相差謬叩諸乩仙云爾今世之果皆前世之因也何曉曉爲余不啻於湯火獄中沃飲冰雪涼秋九月宿疾漸瘳淪茗敲詩杜門謝客卽將去歲塗次之作略事增補編爲一卷昔佛家於金粟中能現如來相一莖草能現丈六金身一指禪能現華嚴世界五城十二樓閣余之詩雖萬萬不能臻斯妙境然甌括兩郡所經之地民生之疾苦山水之奇妙友朋之聚合出產之佳異風

俗之差別俱略見一斑作宗子之臥遊圖觀可作鄭俠之流民
圖觀亦無不可斯詩也排遣過去生中之因發明現在生中之
因留證未來生中之因敢問世云乎哉或者謂淵明乞食尙貽
冥報臨川綺語致墮輪迴文字之因端由自造且因果爲儒者
所不道時至今日世道人心日趨險鑿不可思議而猶津津然
謬談因果洵如蜉蝣不知朝暮螻蛄不知春秋豈知余不過以
山水游歷之因成筆墨唱酬之因將來論功論過賑之果在所
不計也覆醬覆瓿詩之果亦在所不計也與豐干饒舌生公說
法迥別夫又何說之辭

癸丑年冬十二月既望鹽城徐燮自序

甌括紀遊草目錄

渡海

過鎮海縣

輪泊寧波偕同人登岸小飲

至溫州贈青田賑務轉運局杜左園觀察

師預

宿館頭候潮

括蒼道中

至青田縣感賦

宿青田縣署贈葉曉南大令

正度

四十二韻

次葉曉南咏雪韻

署中晤楚南周子珍齋尹

與關

劉東喬茂才

英

約遊城東

天巖山卽次東喬韻

次東喬雨後遊環翠庵韻

登混元峯

遊棲霞寺

過秦淮海先生留宿處重有感三疊碑陰江都郭外峯刺

史韻

閱青田縣志名宦傳弔孫公讓

冬月青田署中有桃一株着花數點得詩二首

過嶺根劉青田先生故居

遊石門洞謁劉誠意伯祠

石門洞觀瀑

景寧道中

景寧舟次大雪

景寧舟次大雪初霽感賦二律

晚至景寧縣治登陸山行十里至城途中口占

景寧縣屬猺民婦女百數十人遮道乞賑日有數起成詩

四首

宿景寧學署邑中紳士招待頗殷賦此留別

渡飛雲江

至瑞安訪黃漱蘭師故居感賦一律

晤黃叔頌觀察

紹第

賦此奉贈

至永嘉遇周子珍齏尹錢塘梁西仲孝廉

有庚

漢陽龔雪

澄參軍

均

招同冰壺館小飲

梁西仲索畫梅題句贈之

周子珍龔雪澄約遊茶山探梅爲雨所阻用東坡先生十

一月二十六日松風亭下梅花盛開韻

遊積穀山

登華蓋山大觀亭

偕六合談夢符明經遊飛霞洞

登臥樹樓放歌

楊園訪菊贈遠峯淡峯兩明經

遊孤嶼

樂清張雲雷茂才招遊雁蕩須十餘日未果往賦此代柬

楊妃帶

西施舌

明府魚

溫州樂府十首

攔街福

聘死婚

唱大詞

演神戲

調女尼

崇淫祀

鬧龍舟

賭花會

設冥庫

打生鞭

與周子珍梁西仲龔雪澄言別得詩三首

自景寧瑞安賑歸滬上呈盛杏蓀宮保

挽唐桐卿先生

桐卿先生告窆有期詩以挽之

滬上留別唐慕潮觀察 宗憲 慕汾部郎 宗郭

除夕日回里祀竈

[Faint bleed-through text from the reverse side of the page]

甌括紀遊草

渡海

[Faint handwritten mark]

鹽城徐燮荔亭甫著



我家居鄰東海東潮聲鐵柱相琤琮拂衣擔篋去甌越快搏雙
翼乘天風天風浪浪亦何猛波濤屹立驚蛟龍陽侯肆虐馮夷
怒噴薄欲碎珠琳宮穿空亂石列如齒雷霆震撼雙耳聾我聞
登州海市現頃刻虛無變相煩神工瓊樓貝闕彈指耳信眉笑
倒蘇髯翁我來雲水豁雙眼四望暝色何空濛閉牕僵臥苦不
寐仙山縹緲魂夢通榜人夜半呼日出萬丈倒射扶桑紅陰陽
爐冶具造化朝浴碧海磨青銅平生眼福歎觀止岱宗日觀將

母同天臺雁蕩會相逢上登觀音華頂諸高峯滄桑人世幾更
變欲問千秋萬歲上古未闢之鴻蒙

過鎮海縣

海天波不靖轉舵到蛟門市湧多魚集山雄一虎蹲帆檣沙岸
立壁壘陣雲屯却敵誠天塹蒼茫夕照昏

甬東稱重鎮瓊島此孤懸農戶篷爲屋漁家海作田林深團野
霧城暗隔炊烟聽擲鄰舟笛鄉心轉黯然

輪泊寧波偕同人登岸小飲

四明山色何蒼蒼遙青入座傾壺觴蛟門潮勢不可遏天風捲
送聲浪浪我渡滄海風力猛呻吟晝夜依匡床鯨濤震撼心膽

裂嘔吐盪滌清詩腸壓驚藉此酒一斗使錢不惜錢看囊黃魚
鮮甚白蚶美烹調笑囑煩廚娘人生苦甘只轉瞬登樓起舞神
飛揚斜陽欲墜市聲散月湖湖水波涵光歸船偃臥酒不醒黑
甜欲覓虛無鄉剡川一曲季眞死千載誰呼狂客狂

至溫州贈青田賑務轉運局杜左園觀察

師預

浩劫罹千古瘡痍滿故鄉傷心蛟出峽折翼雁分行

水伊弟說米

乞平原帖金捐陸賈裝轉輸勞瘁甚普度有慈航

回首魁山路如雲列陣屯

需次酒傾偏軟脚

前患足

花落更銷

魂江闊聲吞榻山多綠到門愴懷家國事空掩淚雙痕

宿館頭候潮

燈檠倦別可憐紅萬種羈愁入夢中不為滕王留一序江神快
助馬當風

荻蘆蕭瑟雁聲哀雲鎖荒寒撥不開強弩三千休浪射夜深高
捲雪山來

栝蒼道中

漫天細雨滯孤篷千里雲山入望中海角風淒如旅雁巖腰露
宿盡哀鴻有情故國潺湲淚何處仙都縹緲峯琥珀酒紅澆不

得溫酒最佳者此行我欲問蒼穹

至青田縣感賦

數萬生靈盡洪流激異災殘尸埋瓦礫朽棟沒蒿萊燈少不成

市城崩只廢臺無家兼死別野哭最銜哀

走石沈沙地崎嶇插足難絕糧憐槁餓無廈庇孤寒樹拔鴉羣

亂山高雁影單荒衙投宿處竟夕起悲酸

宿青田縣署贈葉曉南大令正度四十二韻

芝田剛解纜觀面得新交鸞鷲搏千仞鷓鴣聚一巢繩床聊徙

倚冰署太蕭條車笠盟同契燈檠手並挑霜清猿屢叫月黑虎

頻哮冷處適棲止閒時慰寂寥無聲辨雞犬有戶掛蠅蝻儒吏

空籌策村農未索綯奇災前度降浩劫幾時消風雨披猖夜雷

霆震撼宵萬家隨巨浸百里走驚濤陵谷崇隆陷人聲遠近號

命嗟魚腹飽城破石頭牢瓠子悲歌慘槐衙度地高子身徒戰

慄率僕各奔逃升屋蘿牽足登巖草沒腰琴書沈海若榛莽泣
山魘投暗魂俱喪侵晨腹更枵僧寮權偃息家室咸漂搖雛鶴
難翔翼孤鸞莫續膠蘭芽隨梗泛桃葉逐萍飄緊共黏竿抱珍
憑象網撈甕中妻尙在膝下子重遭骨肉驚完聚箱奩悔盡拋
殘生輕似葉末職繫如匏彭澤官休戀元龍氣不豪我來思拯
溺君復勉分勞飢煮黔熬粥寒施范叔袍白旁稀粒米野外結
團瓢竈突甌全墮沙岡麥盡漂老貧憐沒齒幼病恤垂髫尸葬
全憑藁檐傾莫補茅竹橋危渡蟻松嶺怒騰蛟勇力輸周處仁
聞愧宋郊愁縈天屢問憂集酒還澆敗絮堪爲枕佳蔬漫入庖
關河餘涕淚湘浦寫離騷燭燼心猶熱琴材尾亦焦歸林鴉點

點戀棧馬蕭蕭出岫雲都倦經冬樹後彫好提三尺劍從泛五
湖舫棋局旋翻覆蒼蒼感鬢毛

次葉曉南咏雪韻

天公巧作玉龍戲酒煖紅爐夜色昏曉起萬山深處望幾人僵
臥掩柴門

署中晤楚南周子珍齏尹與蘭劉東喬茂才英約遊城東

天巖山卽次東喬韻

高攀絕頂數峯巒各得浮生半日閒亭瓦斷摧紅樹外塔鈴危
語白雲間蒼松幹老棲鴉點古寺門深剝獸環更喜山翁能健
步醜顏相對夕陽殷

子翁年逾古稀往返十餘里足力不備誠罕見也

次東喬雨後遊環翠庵韻

浩劫茫茫欲問天，登高四望幾炊烟。
磴迷曉霧苔紋滑，泉瀉寒流石骨穿。
仙境屐痕深漸少，佛龕香火破猶虔。
出門謾謾驚濤起，坐聽松風意灑然。

登混元峯

飽飯出門去，信步入幽谷。
一峯高插天，蒼翠鬱林麓。
樵徑仄羊腸，險鑿難插足。
僂僂未里許，危橋跨巖腹。
寒流漱石齒，仰首看飛瀑。
路折梯漸高，飛鳥勢相逐。
奇闢少人蹤，時或逢樵牧。
柏子白於雪，西風葉盡禿。
森森寒襲人，沿山夾修竹。
巨石橫絕頂，中空可作屋。
青牛已仙去，遺像瞻穆穆。
石留試劍痕，苔花剝古綠。

唐代葉方士幽棲探祕錄，下濬煉丹井。泉水清可掬，殘詩峭壁

刊龍蛇字可讀。雖非索靖碑，我欲留三宿。有亭名易冢，耆宿仰

端木

名國翔字鶴田
見定香亭筆記

青田學不孤，繼者先生獨。獨立感蒼茫，遙

天聞野哭。城荒炊烟稀，四望徒蒿目。夕陽紅可憐，染出愁千斛。

小憇環翠庵，墻傾土未築。老僧定枯禪，爐火芋煨熟。庭階集哀鴻，飢腸悲輾轉。熒熒子遺黎，療貧無蔬菽。我佛稱慈悲，衆生命

難續。慘哉空王殿，流民圖一幅。咒鉢降蛟龍，如何肆荼毒。蕭條甌塵生，黃昏飛蝙蝠。松濤絕壑來，朔風震地軸。憂心却如擣，夜

游誰秉燭。歸去臥荒筇，擁被且啜粥。合眼夢山靈，星冠而道服。縞鶴騎翩躚，手贈崑岡玉。囑我和墨淚，斯游記實錄。

游棲霞寺

寺中有鶯花亭宋秦淮海先生謫處州酒監留宿處

一艇水南去行行徑更幽青山四圍疊紅葉半林秋屋破藤蘿
補亭空苔蘚稠名藍欣得到眼福算前修

酒監秦淮海千秋一宿緣鶯聲前代夢鴉影夕陽天潭古澄寒
碧城荒稀暮烟我來遊興倦禪榻可同眠

過秦淮海先生留宿處重有感三疊碑陰江都郭外峯刺

史韻

一宿千秋石碣存寺鐘敲破幾晨昏心傷誤國青苗法淚灑清
溪黃葉村留帶山門懷內翰揮毫劍器舞公孫鶯聲花影渾依

舊黨禍而今不敢論

留題人去石空存野寺尋詩月色昏幾疊青山堪作障一灣流
水自成村展攜靈運追芳躅樓比襄陽築稻孫我欲攜樽酌酒
監病民新法向誰論

淮海南來舊蹟存寺門深鎖近黃昏殘衫破帽愁邊客紅樹青
山畫裏村鴻雪塵緣留佛座鶯花錦句織天孫詞人老去空千
載流水寒鴉莫再論

閱青田縣志名宦傳弔孫公讓

按志載孫公讓鹽城人洪武末主簿山寇葉丁香吳達
三爲亂公讓從大將延安侯勦平之不殺無辜民多賴

焉祀名宦 青田縣志漂沒無存祇有陳樾午主政樓
居城外山腰此書未毀旅窗借錄可補吾邑志書之闕
並詩以記之

浮沉宦海等飄蓬射水微僚滯越東佐得將軍平醜虜書生戎
馬立奇功

玉環獻處雀銜恩不使民冤戴覆盆湯網獨開慈父母一庭生
意滿乾坤

姓名散失古枌榆無恙青山旅魄孤六百年來沈海外好垂象
網得遺珠

文獻飄零最繫思藻蘋異地薦荒祠淮壖再續蠙珠集乞借蘭

臺筆一枝

冬月青田署中有桃一株着花數點得詩二首

劉郎風雪未還家竹外嫣然忽着花咫尺天臺容易到多情招
我飯胡麻

薄霰寒烟世外身瑤池宴罷又紅塵仙姝肯展回春手散盡天
花普度人

過嶺根劉青田先生故居

嶺根爲青田邊境與景寧接壤誠意伯故居也山極高
只石磴一條可拾級而上廿餘里至頂土平地曠花竹
叢茂有良田數十頃先生後裔世居於此者數百家俱

以耕讀爲業無一外姓雜居此次青田大水閭邑被災而此地獨無恙想見先生度地之妙不僅在天之靈呵護已也余舟次匆促未及遍覽爲徘徊者久之

當門環抱盡青山中有澗洄水一灣茅店幾家團谷口桃源千古在人間功高袖手誠驚世書著犁眉獨閉關聞說祠堂森老柏煙霞深處未容攀

賦衍瓜綿孫子賢桑麻掩映力耕田燭機後世全憑算逃劫洪流不在天海外雁鴻能避弋雲中雞犬亦成仙乾坤駐足渾無所我欲攜家傍宅邊

遊石門洞謁劉誠意伯祠

海外探奇掛蓆來前賢祠宇半蒿萊一池清水漱寒玉百丈飛泉挾怒雷古洞遺書無處覓名山異境本天開臥龍不作留侯杳誰是乾坤柱石才

石門洞觀瀑

跨鶴仙人去不回當年誰鑿此門開匡廬雪練龍湫雨一樣天池倒瀉來

千丈懸崖鐵鑄成晉唐過客此題名我來獨有興亡感流盡年光是此聲

依舊青山不洗愁玉龍天矯望中收何人赤手銀河挽萬籟無聲水不流

噴雪驚雷峭壁間，千秋彈指幾時閒。而今涇渭難分析，第一清流不出山。

景寧道中

不斷萬山路，緣溪鎮日行。印沙尋虎蹟，倚澗聽猿聲。灘陡奔流急，船推亂石爭。哀鴻悲滿目，不忍計歸程。

景寧舟次大雪夜泊斷澗萬山無人岸，印野獸蹄跡大如盤。孟歷歷可辨，船窄無門，心悸不寐，倚篷默祝對山，忽現紅燈一點，倏忽上下移時而滅，賦此以紀其異。

深黑山頭列炬行，半空飛燄旅魂驚。宵深似燭燃犀怪，戍斷誠無守。埃兵不滅，神燈勞擁護，平生心地證光明。非人非鬼疑坡。

老一樣江天月落情

山靈有抱切痾瘵，路隔人天淚亦潛。野寺尋秋籠畫燭，獵圍縱火耀刀環。生花銀海分明炫，歸院金蓮頃刻頒。香火因緣留一點，朔風積雪幾時還。

景寧舟次大雪初霽感賦二律

一夜朔風緊，林巒雪改妝。寒冰凝澗白，凍日漏雲黃。衾薄冷于鐵，客孤遠憶鄉。野人憐我寂，來送菜根香。

灑盡監門淚，流民畫未工。河山幾浩劫，身世一飄蓬。飛鳥絕天外，哀猿啼夢中。侵晨行不得，好待日光融。

晚至景寧縣治登陸山行十里至城途中口占

行盡清溪十日程暮烟深處隱孤城
千山雪壓嶺盤路百道泉飛澗
有聲巢覆料難完鵲卵人稀無復聽
鼃更笳輿一束燈三兩只恐荆關畫不成

景寧縣屬獠民婦女百數十人遮道乞賑日有數起成詩

四首

狡如兔脫捷如猿窟處深山學種園
鑿齒漆頤成異種竟教膜拜學唐言

穴耳垂垂掛巨環銅釵豎插月痕灣
熏狸捕鹿尋常事衣袂猶餘血染斑

裙幅圍腰烏布懸無遮墮入野狐禪
獠民婦女着禪裙不着禪阮家犢鼻褌

休著合補裸人叢笑篇

孫元衡巡臺灣著裸人叢笑篇

華嚴世界現崆峒知識誠殊斷尾狨
一切人天大喜獐苗也許被春風

宿景寧學署邑中紳士招待頗殷賦此留別

暫從翰墨結因緣舊夢重尋子敬
氈雞黍盤殮敦古誼鱸堂鐸韻渺秋烟
山容如睡愁窺客樽酒論交醉即仙
榻下陳蕃勞款洽高情應許此邦賢

關山風雪席初溫一曲驪歌悄客魂
蔬筍參禪留後約茅茨破屋不成村
水如絃箭冲橋路晨斷炊烟冷郭門
地僻倍教民食苦鴻泥愧我爪留痕

渡飛雲江

一帆風送挾雲飛，城郭章安掛夕暉。
浮海有螺成列障，驚濤如雪拍征衣。
隆山塔古鈴無語，荒渚菰寒鳥亦饑。
我欲披裘作逃世，垂竿竟日坐魚磯。

至瑞安訪黃漱蘭師故居感賦一律

文星十載落天南，江渡飛雲駐客驂。
一代才名隨逝水，半城山色擁晴嵐。
人傳諫草公猶在，爨識焦桐我尙慙。
惆悵西州門外路，秋風有淚哭羊曇。

晤黃叔頌觀察紹第賦此奉贈

未展調羹手，風雲起漢皋。
淵明隱詩酒，仲蔚老蓬蒿。
大地金甌

缺何人玉尺，操七絃餘古調。
彈破鬱輪袍。

回首秦淮月，虛堂舊夢尋。
文章池鳳價，風雨杜鵑吟。
晚節銘松柏，悲懷感竹林。
閉門謝塵事，垂老鬢霜侵。

至永嘉遇周子珍，避尹錢塘梁西仲，孝廉有庚漢陽龔雪

澄參軍有招同冰壺館小飲

當筵休唱定風波，滿目瘡痍可奈何。
杯酒且拚知己醉，鬢霜翻染異鄉多。
客途聚散隨飄梗，人海升沈問普陀。
池水泠泠羞照影，堦前老樹半婆娑。

管教捫蝨逞雄談，勝饌登盤佐白蚶。
鴻雪因緣牽海若，魚羹風味勝江南。
感人古調琴三弄，照我多情月一龕。
此會何年須記

取廚娘纖手擘甌柑

梁西仲索畫梅題句贈之

敝裘羸馬滯征途小別孤山興轉孤幻出癯仙好丰致一天風
雪夢西湖

花開鄧尉雪猶香我記尋詩駕野航今日海天獨惆悵金樽檀
板憶吳娘

風雨淒其逼歲寒天涯詞客半彫殘含章閣外傷心路剩粉零
香帶淚看

冰霜氣骨玉精神淡染輕綃贈遠人此去相思堪作券山樓籠
罩十分春

周子珍龔雪澄約遊茶山探梅爲雨所阻用東坡先生十

一月二十六日松風亭下梅花盛開韻

孤篷遠泊水雲村細雨梅花斷客魂海上神山不可卽烟輕霰
薄寒林昏綺窗消息隔千里夜深夢落淮南園攜筇載榼負風
約重衾獨戀匡床溫欲展乾坤旋轉手扶桑捧出東方噉縞衣
仙子隔塵世風雪空山獨閉門歲寒落落神交在強求迹相終
無言不如潑墨畫丈壁四圍香影傾芳樽

遊積穀山

聚米可爲山此山名積穀峭壁貫羊腸幽險難插足經冬猶暮
春夾道翳花木我獨陟其巔憑高豁遠目長江渺無際羣山互

起伏琅琅接天風吹散愁千斛精舍半荒涼何人此卜築遺像

奉謝公瞻仰徒穆穆

先奉謝康樂

香積冷無烟那得隨僧粥煮石

斫松枝清泉差可掬不復飯胡麻聊以果飢腹楓葉紅四時

腰山

株有四時紅葉一

株温郡無二斜陽淡空谷歸攜辟穀方好當丹砂服

登華蓋山大觀亭

淮南南來此大觀振衣千仞獨憑欄多情野鶴依人立拂面天

風向曉寒城築斗杓歸一覽

温郡世謂九斗山城

江吞日月跳雙丸荒祠

留得忠魂在細剔殘碑帶淚看

祠奉陳馬二公殉歌逆之難者

太玉洞天何處尋

山為容成子修道今廢有

容城仙蹟渺而今地

鄰滄海銀濤壯囊少丹砂鬢雪侵遠盼鄉書憑雁寄短吹鐵笛

作龍吟浪游漫被山靈笑野望猶懷拯溺心

偕六合談夢符明經遊飛霞洞

把臂出門去行行花柳塘

名地

橋平低野水樹老淡斜陽雉堞層

樓倚漁舟一葦杭片霞歸未得惆悵是仙鄉

霞洞為劉根乘亦

幾兩浮生屐攜登謝客巖

客洞巖

謝

山遙駝古塔江遠逐飛帆苦

茗靈泉淪殘詩絕壁嵌疎鐘聲乍動心境滌塵凡

登臥樹樓放歌

樓在飛霞洞口山腰有樟樹一株大可數人圍倒垂如

虬樓觀三層據樹依山而下真奇觀也相傳此樹為秦

漢時物甌郡多古木此當首屈一指

冬十二月歲壬子我來甌郡窮山水人傳石洞號飛霞有樹倒
垂山迤邐我來策杖汗漫遊木葉微脫似初秋攀蘿捫葛狀偃
僂上登百尺之高樓此樓巧運匠心獨此樹何人種巖腹沈沈
酣睡呼不醒一夢黃梁猶未熟塵寰閱盡幾滄桑虬枝磊磊老
且蒼穿櫺出牖勢蜿蜒勁氣直欲吞八荒有時風雨夜來疾室
小於舟心戰慄海天壁立驚濤狂聲撼孤篷燈欲滅有時明月
上欄干清影扶疎倦眼看彷彿仙人王子晉倒騎鶴背吹笙寒
見說知音能有幾只今潦倒深巖裏卷曲臃腫稱奇才老去婆
娑歎如此我聞臥龍王者師南陽高隱重當時茅廬三顧踐一
諾鞠躬盡瘁徒奔馳希夷先生根本固參考元宗妙神悟蒙頭

大睡五千年露電流光彈指度世間惟靜可全真韜晦常完物
外身崖厂頤養得異趣嗜好剝削喪其神君不聞東海之外有
大椿無量之壽八千春又不聞孔明廟前有老柏黛色參天根
如石鬼加呵護神扶持兩地猶爲人愛惜此樹盤曲柯青銅別
開生面走蛟龍樵斤駭愕不敢顧靈異能逃劫火紅高歌一曲
歌未已樹若有知笑且喜長嘯一聲山谷驚孤盤地軸何時起

楊園訪菊贈遠峯淡峯兩明經

攜筇閒訪兩幽人門鎖烟蘿冷不春占得甌江好秋色萬花屏
裏著吟身

老去婆婆感鬢絲蕭齋多種傲霜枝黃金布滿祇園地清絕關

西醉不辭

寒葩馥郁透疎櫺詩卷橫陳照眼青才比盈川壓盧後酒痕燈
暈晚香亭

影共澄潭一樣清靈泉酌處可長生飢餐果得災黎腹欲向先
生乞落英

遊孤嶼

曉烟破微茫樓閣參差起何時一點螺飛入甌江裏上有兩浮
屠天間去尺咫砥柱作中流歷劫幸不燬我來值嚴冬扁舟蟻
沙嘴晨雞甫四啼巖城探未啟榜人知我心移篷出荒葦推窗
眼界寬盡觀林壑美霜鐘三兩聲塵夢逐流水須臾達彼岸石

滑平如砥信步入寺門古佛笑且喜佛笑眼前人知機能有幾

左鄰有荒祠老樹蔭邐迤當年文信國誓師集於此血淚灑崖

山留題音變徵前明卓忠貞廟貌並崇祀傷心瓜蔓抄大節重

桑梓孤嶼信不孤凜然成後死登樓懷孟公樓供孟氣接蓬萊

紫長嘯天地驚俯視海如蠡太守謝靈運千秋勞仰止遺像勒

貞珉有亭拳石峙悔生古人後憑弔淚空灑欲澆愁萬斛臨風

無酒釀老僧爲烹泉迎客忽倒屣寒雪淪龍團芳冽沁唇齒云

說水迴環後會從茲始有齋名去來寺中必有泉僧來齋有迴環水去

於斯悟妙理我夙耽禪悅雅愛談元旨飲罷出門去心清絕

塵滓初月掛銅鉦羣山明眼底漁艇倏出沒驚濤瀉千里畫圖

迥異前變幻一彈指回首囑山靈把我鬚眉視他時續舊游好
乘琴高鯉

樂清張雲雷茂才招遊雁蕩須十餘日未果往賦此代柬
長途已作打包僧辜負名山最上層謝客空攜幾兩屐坡公倦
拄一枝籐龍湫噴雪高無極屨海攜雲愧未能羨煞天南靈秀
窟好峰百二讓君登

歲闌臘鼓聽聲聲旅館孤燈客夢驚溟渤鯤鵬羞插翼洞天猿
鶴笑無情澗懷斤竹留遺跡龕散曇花訂後盟乞覓靈巖一片
石他年待我刻題名

楊妃帶

卽帶魚也玉環嶼洋面產最佳鮮美異常瑩白如玉溫
之好事者錫以此名篷窗無事戲賦二絕
一笑凌波羨網師雪濤如練洗凝脂漁娃解得絲絲扣絕似華
清出浴時
馬嵬羅襪渺難尋海樣相思直到今遺恨化爲魚比目管教烟
水結同心

西施舌

蛤屬也甌海中產最美

久調鶯語尙溫存越水吳山共酒尊小劫泥犂恩未斷香魂怕
返苧蘿村

拚將公子伴無腸
顰笑傾城轉自傷
今日廣長饒不得
五湖夢醒水雲鄉

明府魚

亦名墨魚又名烏賊溫洋出產甚多按此魚名明府者述異記載和州歷陽淪爲湖湖中有明府魚奴魚婢魚是和州之明府化爲此魚也又此魚在水中恐見捕乃吐墨以障漁者轉從而捕之故名墨魚

現出宰官身曾在靈山會如何作宰官轉而侶鱗介小民如魚肉膏血吸稱快天理妙循環轉瞬償此債名士鯽何多步兵鱸作膾清難訟庭懸臭從鮑市賣生前貪墨心至死猶未戒笑爾

泳游時吐之以自蓋嗟嗟不知悔始終以墨敗

溫州樂府詞十首

攔街福

攔街福攔街福二月三月春光燠張燈設彩鬪繁華賽會酬神豐酒肉六街徹曉管絃聲到此渾如不夜城上元燈火遜燦爛畫閣珠樓睡不成接行東嶽會楊柳映青旗就中方相氏高卻與簷齊旁街曲巷必周歷家家祈福操豚蹄吁嗟乎一月萬緡費金錢紅男綠女爭摩肩何不解衣推食活溝瘠陰隲耳鳴種福田

聘死婚

聘死婚聘死婚死後還聯夫婦恩夭折未婚宜立嗣有父無母
須討論東家有女年碧玉未及破瓜命不續親鄰同作撮合山
氤氳簿上檀郎屬生未共羅帳死忽同邱墳漆燈朗照合歡被
黃壤幽羈倩女魂聘夫不許重鑄錯女家定必多需索無邊慾
壑飽難填纔得珠還葬村郭噫吁嘻十年空守貞不字九泉改
適等兒戲生前同牀各夢怨偶多死結絲羅眞多事

唱大詞

唱大詞唱大詞九月菊花開幾枝廣應宮裏香事盛十四娘娘
閃靈旗娘娘說姓陳不知何代人一臺二磬踞高座互講事蹟
成天神旁列一鼓響丁東盲詞俚語座生風有時談虎忽色變

大家嗟嘆淚沾面有時錦上更添花大家笑語爭喧譁三晝夜
或五晝夜婦女叢聽夜雜坐冬烘學究雪滿鬚臯比枯坐講唐
虞僉父過門掩耳走佯說我非聖人徒

演神戲

演神戲演神戲不在街頭卽神寺一年三十有六旬每日登臺
勞鼓吹三處五處奏伎工卜晝卜夜滿城同舞衫歌扇神亦厭
要明四目達四聰有時敲銅鈺雜以爆竹聲人山人海途爲塞
迎神送神曲數更龜年舊熟梨園譜紅氍毹上參差舞一曲霓
裳側耳聽那怕漁陽動鞀鼓我聞示奢以儉有古訓一國之人
何若狂古今忠孝發天良淫靡須防濮與桑衣冠優孟出登場

貴胄負薪尙足傷倘教演出滔天劫應落旁觀淚萬行

調女尼

調女尼調女尼爭博空門賣笑資短髮鬢髻肩可及手如柔荑
齒瓠犀妙齡慣欠風流債沈溺滔滔愛河愛傳鉢傳燈有替人
法門不二妖嬈態年華漸長髮漸髡蘭若挑燈拭淚痕二首一
身共命鳥消受迦陵三十春也參上乘禪也擅專房寵散花千
朶隨喜緣牟尼一串多情種渡人憑慾海縛繭仗金繩天魔降
不得放出怨摩登吁嗟乎曇雲法雨墜諸天頽俗渾如古惠泉
死後油鐺百沸煎烈火誰栽並蒂蓮

崇淫祀

崇淫祀崇淫祀地方官吏不敢止盆盎盛水浴木偶飲之立盡
婦求子山下多築花粉宮附祀號張三令公怪有青蛙神五通
甌越風俗將毋同蜈蚣洞主何妄誕神巫擊鼓夜不散白雞洞
主分位尊焚香祈禱酒盈樽有七姑娘宮步出瑞安門七女七
夕拜姊妹會言相約值年輪垂髻女子正妙年先爲鬢鬢兼畫
眉不然洞主攝去作新婦要從香火結因緣河伯雅愛如花貌
太守誰是西門豹餼羊不設正朔非淫祠白日山鬼嘯

鬧龍舟

鬧龍舟鬧龍舟五月五日溯盛游錦纜牙檣舟突大數十人挽
如挽牛舟後梢婆美且麗俊童扮出最風流旌旗耀日鮮艷內

圖林雜述
架鞦韆一舟細數開支費須耗金錢緡數千另有草龍船式小船中並設一栲栳內設土偶各一尊爭先恐後須求神倘教此舟落人後鞭其土偶難消受倘若此舟超人前獻牲設醴虔復虔會昌湖畔波千頃健兒身手誇絕頂君不見奇技淫巧亂人心空中更有飛行艇

賭花會

賭花會賭花會例禁綦嚴受害大票有三十六花名暗中逆億逞狡獪呼盧喝雉較贏輸鬼域行爲更無賴宿墓爲求鬼宿廟爲求神男女嫌疑渾莫別醜態百出招游魂更聞上下河鄉有二廟妖由人興倍堪笑一神受制一神媚神道如斯應絕倒一

人神項鎖琅璫一人緩頰求玉皇許以點票方下場須臾花名加丹黃一神貌似冶遊郎最愛嬌女明靚妝坐膝捋鬚神飛揚錦標冀奪引領望吁嗟乎求鬼求神終無效家資轉瞬全虧耗孤注一擲不復還到頭買得窮無告

設冥庫

設冥庫設冥庫中元節近饒鬼趣開元寺內建道場水陸雜陳佛超度寺後磚屋十數間紙灰堆積如邱山焚之他處鬼不得疑是冥路非塵寰城中紙錢蝴蝶飛家家祭奠淚沾衣賢者筭庫勤且慎拔之未職古所稀重重簿籍誰司柄出入勾稽及萬姓郡塢金銀氣未銷銅山支用瓶難罄餒而若敖鬼夜泣聲歎

歎多情親友化冥鏹雙忠祠畔送香爐噫吁嘻當今庫藏空無
有倒囊刮篋嗤羣醜鬼國多餘白打錢恐落九幽魍魎手

打生鞭

打生鞭打生鞭玉環積習笑相沿上元燈彩光燭天城隍廟裏
簇香烟釵光鬢影鬪嬋娟熊羆入夢望眼穿綠萼空花年復年
繡祿冀遇石麟緣他婦笑嫣然馬策施橫撻操刑儼王章低眉
乞菩薩着手還爭祖逃先傷心怕作鄧攸絕可憐憔悴冰玉姿
雛鳳清聲夢見之編蒲示辱出嬉笑橫陳似扑平王尸從此鴛
鴦不獨宿弄得璋兮萬事足膝前倘有跨籠兒鞭長從不及馬
腹

與周子珍梁西仲龔雪澄言別得詩三首

天地如逆旅人生等秋蓬藉此天風力吹聚一室中投契若前
定朝暮論心同索畫筆盡禿開樽酒不空名山供盛游負囊隨
奚童滾滾甌江水情緒渺無窮如何一池萍飄散西復東安得
膠與漆四蹄黏青驄

履霜堅冰至閉塞成冬候世道日凌夷洪水而猛獸賢人隱空
山於此慎去就吾輩生計艱風塵出奔走旅人比雁孤博士嫌
羊瘦無田不復歸宦轍洵非舊老驥困監車戀此三升豆文章
賤藜狗易米從誰售巢父掉頭去東海籠雙袖

驪駒已在門歸途憐我獨折柳贈行人霜寒枝盡禿忍淚話須

國朝續述
與執手河梁曲好花開謝易明月缺圓速更變有滄桑遷移及
陵谷前路杳難憑後會差可卜君具阮籍眼我捧東坡腹相期
葆歲寒雲雨休翻覆千里猶一堂鱗鴻遞尺幅天末好聯吟長
空作詩屋

自景寧瑞安賑歸滬上呈盛杏蓀宮保

茫茫禹甸歎其魚爭拜仁人惠賜初遷謫紅塵仍佛子婆娑白
髮老尙書范舟一樣懷飢溺班史千秋定毀譽惆悵關山風雪
裏平生心事付樵漁

神仙雅誼比雲高樽酒殷勤慰遠勞元禮門楣重聲價少陵詩
卷續離騷銅駝荆棘新埋恨尺鱷風雷怒走濤明日掛帆向東

去海天何處釣金鰲

唐桐卿先生熱心賑務三十有七年甌括水災招僕與斯

役三月竣事返滬而先生已歸道山月餘矣詩以哀之

天心仁愛何太刻洪水災沈甌括域下民十萬歎其魚生者流
離不得食梁溪潛叟蜀箋裁邀我春申浦上來支離病骨漸不
起慈惠婆心思澹災嗟嗟無處呼將伯何術成金能點石解衣
推食願終償一息尙存心倍赤我別公去身徨徬我誌公語不
敢忘急招同伴作南渡海山屹立風濤狂登程察勘無完土如
此奇災從未覩天然圖繪鄭監門塞道流民狀最苦最苦芝田
青田次鶴溪景甫壯者僵臥幼者啼寸椽片瓦盡冲塌逃亡滿

目成瘡痍雷轟電掣山崩倒殘生魚腹悲同飽就中剩有子遺
民飢啼寒號萎宿草運來義粟苦無多杯水車薪可奈何鄧通
銅山有時罄布金度厄誰彌陀傷心當道半豺虎江皖賑餘吞
不吐波迴雲湧軍政興吸盡脂膏成怨府可憐槁餓形如鳩死
者白骨無人收若將此款活道殣螻蟻生命奚遽休鰥生數月
牛馬走事竣歸來爲公壽登堂總幕忽風淒如此善人天不佑
吁嗟乎凶荒水旱災屢侵麥舟高誼何處尋生民此後將安賴
絲繡平原島鑄金

桐卿先生告窆有期詩以挽之

寒山月落聽啼鳥回首同舟客漸孤震地波濤掀海國連牀風

兩憶姑蘇欄干苜蓿書千卷官閣梅花酒一壺話到開元遺事
在白頭宮女淚全枯

繁霜凍雪鬢絲侵散盡祇園布地金到處總留生佛頌死時猶
具活人心鉅橋集粟隨車發東魯功碑墮淚尋

君州曾建祠勒
碑以紀公德

度世如來竟西去瘡痍滿目淚難禁

善人如此奪高年搔首茫茫欲問天濁世無端容害馬西風有
恨咽寒蟬徵文終合垂千古鋤惡還期到九泉會葬我慚東漢
士佳城舊卜孔山巔

獨抱冬心冷不溫挑燈翦紙爲招魂樽空琴歇無師友桂馥蘭
馨蔭子孫陸族敬希范參政畫圖愁煞鄭監門他年親展先生

墓萬樹梅花拭涕痕

滬上留別唐慕潮觀察

宗憲慕汾部郎

宗郭

垂老難爲別河梁手共攜幾年飛鳥倦五夜孝烏啼末學失山
斗中原正鼓鼙橫流滄海急何日掃鯨鯢

莫抱終天憾當思來日難道窮資義俠人苦是飢寒一臂力能
助重泉夢亦安父書誠善讀珍重好加餐

除夕日回里祀竈

天涯辛苦爲誰忙千里歸來奠一觴今日相逢應失笑越東帶
得滿頭霜

篋中剩有百篇詩島佛年年祭亦癡風馬雲車求暫住夜闌代

檢斷腸詞

六街爆竹響聲聲柏酒椒盤次第呈回首征途風雪裏炊烟如
縷斷山城

笑攜兒女共迎年火爇圍爐夜不眠紅燭兩行香一炷履霜心
迹告蒼天

溫河市 物 館